

DOMENIE VII DI PASCHE

Antifone di jentrade cf. Sal 26,7-9

Scolte, Signôr, la vôs dal gno berli.
Il gno cûr a ti ti fevele, ti cîr la mê muse.
La tô muse, Signôr, o voi cirintle.
No sta platâmi alore la tô muse, aleluia.

Si dîs Glorie a Diu.

Colete

Signôr, scolte ben disponût lis nestrîs preieris
par che il Salvadôr de gjernazie umane,
che par fede o crodìn te glorie de tô maiestât,
nus fasi sintî che al è presint framieç di nô fin a la fin dal mont
come che lui stes nus à imprometût.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 1,12-14

A jerin salts tal preâ.

Dai Ats dai Apuestui

Dopo che Jesù al fo strafuît, i apuestui a tornarin de mont Ulive in Jerusalem, che e je distant tant che une cjaminade di sabide. Tornâts in citât, a son lâts sù adalt, là che a jerin a stâ. A jerin Pieri e Zuan, Jacum e Andree, Filip e Tomâs, Bartolomiu e Matieu, Jacum di Alfeu e Simon il zelot, e Jude di Jacum. Ducj d'amôr e dacuardi, a jerin salts tal preâ, insiemi cun cualchi femine, cun Marie mari di Jesù e cui siei fradis.

Peraule di Diu.

SALM RESPONSORIÂL dal Salm 26

R. O viodarai il boncûr dal Signôr inte tiere dai vîfs.

O ben:

R. Aleluia, aleluia, aleluia.

Il Signôr al è la mê lûs e la mê salvece,
di cui varaio teme?

Il Signôr al è chel che al pare la mê vite,
di cui varaio pôre? **R.**

Une robe i domandi al Signôr
e dome cheste o brami:
di stâ te cjase dal Signôr
ducj i dîs de mê vite,
par gjoldi de bontât dal Signôr
e veglâ sul crichedi tal so templi. **R.**

Scolte, Signôr, la vôs dal gno berli,
vê dûl di me e rispuindimi.

Il gno cûr a ti ti fevele,
ti cîr te la mê muse;
la tô muse, Signôr, o voi cirintle.
No sta platâmi alore la tô muse. **R.**

SECONDE LETURE 1 Pi 4,13-16

Furtunâts vualtris, se us svilanaran par colpe dal non di Crist.

De prime letare di san Pieri apuestul

Benedets, te misure che o cjapais part ai patiments di Crist, indalegraitsi parcè che ancje cuant che si pandarà la sô glorie o podarês gjoldi e stâ contents. Furtunâts vualtris se us svilanaran par colpe dal non di Crist, parcè che il Spirt de glorie e il Spirt di Diu al polse parsore di vualtris. Che nissun di vualtris nol vedi di patî parcè che al è sassin o lari o delincuent o spion. Ma se un al patîs parcè che al è cristian, che no si vergogni; che anzit al laudi Diu par chest non.

Peraule di Diu.

CJANT AL VANZELI cf. Zn 14,18; 16,22

R. Aleluia, aleluia.

No us lassarai vuarfins, al dîs il Signôr:

o tornarai di vualtris e il vuestri cûr al sarà plen di gjonde.

R. Aleluia.

VANZELI Zn 17,1-11

Pari glorifiche to Fi.

Dal vanzeli seont Zuan

In chêt volte, Jesù al alçà i vôi viers dal cîl e al disè: «Pari, e je rivade l'ore. Glorifiche to Fi par che il Fi ti glorifichi te. Midiant che tu i âs dât podê sun dut ce che al è cjar, che ur dedi la vite eterne a duçj chei che tu i âs dâts. E je cheste la vite eterne: che ti cognossin te, l'unic vêr Diu, e chel che tu âs mandât, Jesù Crist. Jo ti ài glorificât su la tiere, puartant al colm l'opare che tu mi vevis dade di fâ. E cumò tu, Pari, glorifichimi me denant di te cun chêt glorie che o vevi denant di te ancjemò prin che al fos fat il mont.

Jo ur ài fat cognossi il to non ai oms che tu mi âs dât dal mont. A jerin tiei e tu tu mai âs dâts a mi e lôr a àn metude in pratiche la tô peraule. Cumò a son vignûts a savê che dut ce che tu mi âs dât al ven di te, parcè che lis peraulis che tu mi âs dadis, jo ur es ài dadis a lôr e lôr lis àn acetadis e a àn ricognossût che o soi vignût fûr propit di te e a àn crodût che tu mi âs mandât tu.

Jo ti prei par lôr; no prei pal mont, ma par chei che tu mi âs dât, parcè che a son tiei. E dut ce che al è gno al è to e ce che al è to al è gno, e jo o soi stât glorificât in lôr. E jo no soi plui tal mont, ma lôr a son tal mont, intant che jo o ven di te».

Peraule dal Signôr.

Si dîs O crôt.

Su lis ufiertis

Acete, Signôr, lis preieris dai fedêi
dutune cu l'ufierte dal sacrifici,
par che, in gracie di chest at di sante religjon,
o podìn rivâ a la glorie dal cîl.
Par Crist nestri Signôr.

Antifone a la comunion Zn 17,22

Ti prei, Pari, che a sedin un,
come che o sin un ancje nô, aleluia.

Daspò de comunion

Scoltinus, Diu, nestri Salvadôr,
par che midiant di chescj sacrisants misteris
o podìn sperâ che in dut il cuarp de Glesie

si colmi ce che i à za sucedût al so cjâf.
Par Crist nestri Signôr.